

सुरगभूमी भद्रवाह ते उसदी संस्कृति

□ डॉ० सत्यपाल श्रीवत्स

साढ़े भारत देसै दे विशाल सांस्कृतिक आयाम दा रूप उस शैल बागै आह्ला लेखा ऐ, जिस बिच नेकें किसमें दे रंग-बरंगे फुल्लें दियां क्यारियां होन।

अस दिक्खने आं जे भाएं साढ़ी विशाल संस्कृति दी इक्कै आतमा सारियें प्रादेशिक संस्कृतियें च विराजमान ऐ, पर सारे प्रदेशें दियें संस्कृतियें दे अपने-अपने नोखे ते बक्खरे रूप बी न। इसदा कारण ऐ, हर प्रदेश दियां भूगोलक, धार्मिक, इतिहासक, राजनीतिक ते समाजक परिस्थितियां, जिं दी बजह कन्नै उं'दे च रौहने आहले लोकें दे खान-पीन, रैहन-सैहन ते रीति-रवाजें च बी काफी परिवर्तन आई जंदा ऐ। पर, इस सब दे बावजूद अस सब्भै इक विशाल भारती संस्कृति दे गै अभिन्न अंग आं। साढ़े इस अनेकता च एकता (unity in diversity) आहले रूप दी दुनिया-भर दे लोक तरीफ करदे न। असलै च इसदे पिच्छें मूल स्रोत ऐ, साढ़ी वैदिक संस्कृति दा अमर रूप। इससै आस्तै डॉ० इकवाल जनेह गम्भीर चिन्तक-विद्वान ने ठीक गै आक्खे दा ऐ -

कुछ बात है कि हस्ती मिटती नहीं हमारी।

यूनानो मिस्र रोमा सब मिट गए जहां से ,

अब तक मगर है बाकी नामों-निशां हमारा।

साढ़ी इस अमर संस्कृति दा गै चमत्कार ऐ, जे साढ़ै देसै उप्पर नेकां हमले होए, नेकां विदेशी अपनियें-अपनियें संस्कृतियें ते धर्म कन्नै इत्थें आइयै बस्से ते उं'नें अपनियें संस्कृतियें कन्नै साढ़ी संस्कृति गी प्रभावत बी कीता, पर इस कोला मता किश लेइयै अपनियें संस्कृतियें गी सजाया-सोआरेआ बी, पर साढ़ी संस्कृति दी मूल भावना दा अनन्त प्रभाव अपने उस्सै रूप च चलदा रेहा। जिसलै अस जम्मू-कशमीर राज दे जम्मू संभाग दे म्हत्तवपूर्ण अंचल भद्रवाह दे बाँरे गल्ल करने आं, तां इत्थुआं दी संस्कृति च बी असें गी उस्सै प्राचीन जां वैदिक संस्कृति दी आतमा दा रूप गै झांकदा लभदा ऐ। इससै आस्तै संसार प्रसिद्ध भाशा विज्ञानी डॉ० सिद्धेश्वर वर्मा ने भद्रवाह दे संस्कृत विद्वान पं. गौरी शंकर भद्रवाही द्वारा वि० सं० 1995 च श्रीमद्भगवतगीता दे भद्रवाही भाशा च अनुवाद दी भूमिका च ठीक गै

आक्खे दा ऐ - My investigation of Bhadrawahi has shown that it is one of the most important languages of India. In this language, have been preserved words which are available only in Vedas, while in many ways, its grammar is older than even Prakrit. Such venerable language deserves to be converted into a literature, and the glory of doing so undoubtedly comes to Pt. Gouri Shankar who, for the first time in the History of India, has printed a book of high merit in this great language. Let me hope that this pioneer work will stimulate many similar works by the other authors whose mother tongue is Bhadarwahi.

डॉ० वर्मा होरें भद्रवाही बोल्ली दी इक होर बशेशता सिद्ध कीती दी ऐ जे इसदे च नपुंसक लिंग दी मजूदगी बी है, जेहड़ी इस कन्नै गुजराती ते सिंहली भाशें दे अलावा होर कुसै आधुनिक भाशा च मजूद नेई ऐ।

भद्रवाही अंचल च भद्रवाही बोल्ली बोलने आहलें दे अधार पर 'भद्रवाह' ते 'भलेस' इं'नें द'ऊं तसीलें च बस्सने आहले लोक गै मुख रूप कन्नै इस बोल्ली दा प्रयोग करदे न, जिं दी गिनतरी दो-त्रै लक्ख दे दरम्यान ऐ।

अस दिक्खने आं जे जित्थें भद्रवाही अंचल दे लोकें दी भाशा बक्खरी ऐ ते कन्नै उं'दे रैहन-सैहन, खान-पान ते रीति-रवाज बी बक्खरे लभदे न, तां उत्थें उं'दी सांस्कृतिक परम्परा बी बक्खरी ऐ, पर उसदी मूल-भावना जां आतमा इक्कै भारती गै ऐ। एह गल्ल बी ध्यान देने जोग ऐ जे समें दी उथल-पुथलें दी बजह कन्नै इस लाके च डोगरी, कशमीरी, कांगड़ी, किशतबाड़ी, पोंगली बगैरा बोलने आहले लोक बी आई-आई बसदे गे। इसलेई भाएं भद्रवाही बोल्ली च इं'नें बोल्लियें दे केई शब्द आई रले, पर फही बी इस बोल्ली ने अपनी बक्खरी पनछान बनाई गै रक्खी दी ऐ।

इत्थें एह तत्थ बी स्पष्ट करना जरूरी ऐ जे डोगरी आह्ला लेखा भद्रवाही वर्ग दियां बोल्लियां-भद्रवाही, भलेसी ते पाडरी बी पच्छमी पहाड़ी वर्ग च शामिल न, इसलेई इसदा डोगरी कन्नै बड़ा नेडुमां सरबंध होना सभावक ऐ।

भद्रवाह दे नांऽ ते प्राकृतक सुन्दरता

सुर्गभूमी खुआनै आहले भद्रवाह प्रदेश दे भद्रकाशी, भद्राश्रम, भद्रदेश ते भद्रद्वीप बगैरा केई नांऽ बी इसदी चंगेआई ते खूबसूरती दे गै परिचायक न, की जे

संस्कृत भाशा दा 'भद्र' शब्द भलाई ते चंगेआई दा गै सूचक ऐ।

शिवालिक पहाड़ियें दे उत्तर-पूर्व पाससै ते पीर पंचाल शृंखला दी गोदी च एह प्रदेश समुद्र-तल कोला 5520 फुट्ट दी उचाई पर स्थित ऐ। इस प्रदेश च केई ग्रं ते कसबे भाएं अपनियें-अपनियें बिशेशताएं कन्नै मशहूर न, पर भद्रवाह ते भलेस दो तसील मुख्यालय, केई आधुनिक सुविधें कन्नै सम्पन्न होने करी अपना खास मकाम रखदे न। हरे-भरे दयारें, चीड़ें ते पड़तल बगैरा नेकें बूहटें कन्नै सज्जे-संवरे दे जंगल, सुंदर-सुंदर हरी-भरी घाटियां ते म्हेशां बर्फ कन्नै लदोई दियां उच्चियां-उच्चियां पहाड़ी चोटियां, इस अंचल गी सचमुच सुरगभूमी खुआने च अपनी अहम भूमिका नभादियां न। संखेप च इ'यां सेही होंदा ऐ जे प्रकृति देवी इस प्रदेश च म्हेशां अपनियां नेकां खेढां खेढदी रौहदी ऐ। इस अंचल दी इस प्राकृतक सुंदरता ते शांतता ने इत्थुआं दे लोकें दे सभाऽ च मिठास, धीरज ते शराफत बगैरा गुण भरे दे न।

भद्रवाही लोक, लोकवार्ता ते लोक संस्कृति

की जे कुसै बी राज जां प्रदेश दी स्थानी संस्कृति, इतिहासक, धार्मिक ते मिथक पैहलुएं उप्पर लोक-संस्कृति दा प्रभाव जरूर होंदा ऐ, जां भाएं दूए शब्दें च इ'यां आक्खो जे उंदे बीऽ लोक-वार्ता जां लोक-संस्कृति च जरूर विद्यमान होंदे न, इसलेई अस जिसलै भद्रवाह अंचल दी संस्कृति दी गल्ल करने आं तां असें उर्थों दी लोक-वार्ता दें विशाल भंडार गी जरूर फरोलना, खंघालना लोड़चदा ऐ।

लोक-साहित्य विज्ञान दे लेखक डॉ० सत्येन्द्र ने ठीक गै आक्खे दा ऐ जे लोक-वार्ता दा साढ़े जीवन कन्नै अदान-प्रदान होंदा ऐ।

लोकमानस भाएं अनपढ़ गै होंदा ऐ, पर तां बी उसदी संवेदना, कल्पना-शक्ति ते चिन्तन-शक्ति कुसै बी संवेदनशील पठित माहनू कोला घट्ट नेई होंदी। इ'यै बजह ऐ जे प्रकृति दे खु'ल्ले ते रमणीक-सुहावने वातावरण च, जिसलै ओह कोई मर्मस्पर्शी द्रिश शक्तिखदा ऐ, तां उसदी संवेदना च उथल-पुथल मची जंदी ऐ। उसलै ओह नच्ची उठदा ऐ ते आप-मुहारा गान लगी पौंदा ऐ - विरह-गीत, प्रेम-गीत ते अद्रिश शक्ति दे प्रति सम्बोधन-गीत ते पही उ'ऐ बनदा ऐ, लोक साहित्य। इ'यां लोककथाकार धार्मिक विश्वासें, मिथक तत्त्वें चा ते दंद-कथें चा प्रेरणा लेइयै अपनियां लोक-कथां रची लेंदा ऐ। इससै चाल्ली लोकवार्ता दे दूए अंगें दा जनम बी कुसै नां कुसै-प्रेरणा जां प्रभाव कन्नै होंदा चलदा ऐ।

इ'नें भद्रवाही लोकवार्ता दे जनम दे सरबंध च बी इ'नें गै जां इस कन्नै मिलदे-जुलदे तत्त्वें गै कम्म कीता होग, ऐसा साढ़ा अनुमान ऐ। पिछले दिनैं डॉ० प्रियतम कृष्ण कौल दी - "पर्वतों के उस पार" शीर्षक कन्नै लोकवार्ता पर इक म्हत्त्वपूर्ण रचना (हिन्दी भाशा च) प्रकाशत होई ही। उस बिच विद्वान लेखक ने भद्रवाह अंचल दे लोकवार्ता साहित्य उप्पर चंगी चाल्ली लोऽ पाई दी ऐ। उस बिच लेखक ने 84 लोकगीत, 186 सुकली-गीत (लोकगीतें दी इक बक्खरी विधा), 23 लोक-कथां, 254 कहावतां, 148 मुहावरे ते 134 फलौनियां संकलत कीती दियां न। इंदे च असें गी भद्रवाही अंचल दी संस्कृति दे लोकमानस आह्ले पक्ख दी सच्ची-सुच्ची सोच दे रूप आहली तस्वीर स्पष्ट लभदी ऐ। इ'नें लोक गीतें च असेंगी नेह भक्ति-गीत ते गुरु-वंदना गीत लभदे न, जेहड़े राम, शिव, शक्ति नाग बगैरा नेकें देवी-देवतें दे प्रति अपनी भक्ति ते शरधा प्रगट करने आस्तै लोकमानस ने रचे दे न। इंदे इलावा पांडव सरबंधी गीत न, जेहड़े पांडवें दे बनवास काल दे मौकै पर उंदे भद्रवाह प्रदेश च किश चिर तक प्रवास करने कोला प्रभावत होइयै लोकमानस ने रचे होने न, ऐसा साढ़ा विश्वास ऐ। धार्मिक ते मिथक सरबंधी गीतें दियां किश पंक्तियां इत्थें प्रस्तुत न :-

राम-सरबंधी (एंजली भक्ति-गीत)

(1) राम त लछमन भक्त खाने विश्शे पानीआ -

- री लगगी प्यास हे राम:

नडिऐरों बिन्नो सीस घडल्लू, सीतारानी चली-

-पनिहारे, हे राम!

अक पल बलगी, दुइयों बलगी, सीतारानी-

-फिरी बि न आई, मेरे राम!

भावार्थ - राम ते लछमन भक्त खाने गी बैठे हे तां उ'नें गी त्रेह लगगी। सीता झट्ट उट्टी, बिन्ना ते घड़ा सिरै पर रक्खेआ ते पानी आहनने गी चली गई। राम ते लछमन ने इक पल बी इंतजार कीता ते दो पल बी कीता, पर सीता नेई परतोई।

(2) शिव मैहमा सरबंधी गीत

शामी शामी शामी मेरे नीरीं नीरीं कार जी!

नीरीं नीरीं कार शामी तीं जो नमशकार जी।

नई किए धरत शामी मेरे, नई थिए आकास जी।

धरत ते अकास शामी बने त संजोग जी।

भावार्थ - शांती करने आहले शिव, तुस निराकार रूप ओ। तुसें गी नमस्कार ऐ। पैहलें नां गै धरत ही ते नां गै गास हा।

धार्मिक ते मिथक - इतिहास सरबन्धी लोकगीत रचने दे बाद भद्रवाही लोकमानस अपने समाजक जीवन पाससै ध्यान दिंदा ऐ, जिं'दे च औं दे न:- ब्याह-गीत, बाल-गीत, पर्व-गीत ते प्रेम-गीत बगैरा। किश उदाहरण दित्ते जं दे न :-

(1) खेती-बाड़ी सरबन्धी गीत

डौले डौले डौहोलिये। डौले डौले डौहोलिये।

डौले डौले डौहोलिये। डौले डौले डौहोलिये।

भावार्थ - असें खेती-बाड़ी शुरू करी दित्ती दी ऐ। ओए इसी चंगी-चाल्ली करो। इसी चंगी चाल्ली करो। अस खेती-बाड़ी दा कम्म बड़े चाऽ कन्नै करा करने आं।

(2) शावा हो शेरा (इक) - हां, हो हां (सब)

कठि तेरो डेरो (इक) - हां, हो हां (सब)

राती भाभिआरे डेरे (इक) - हां, हो हां (सब)

भाभी रूशशोरी भोली (इक) - हां, हो हां (सब)

भावार्थ - ए शेर, तेरा डेरा कुत्थें ऐ ? रातीं में भाभी दे घर हा। भाभी नराज होई गई ही। जित्थें तक लोक-कत्थें दा प्रश्न ऐ, साढ़ा अनुमान ऐ जे लोकमानस ने केइयें कत्थें दे बारे च उन्न अपने परिवेश कोला प्रभावत होइयै अपनी शुद्ध कल्पना कोला कम्म लेदा ऐ, जदके केइयें दे बारे च उन्न परम्परा कोला चली औंदियें दंद-कत्थें चा मिथक ते इतिहासक तत्त्व लेइयै उंदे कन्नै अपनी कल्पना-शक्ति दा संयोग करियै उंदी रचना कीती होग ते उसदियें त्रीए वर्ग आहलियें कत्थें दा अधार सच्चियां इतिहासक घटनां गै स्पष्ट सेही होंदियां न।

लोक-कत्थें दे बारे च प्रो० प्रियतम कृष्ण कौल दा एह आखना स्हेई ऐ जे इंदा मुख उद्देश्य लोक-रंजन ऐ। इसदे लावा रोमांचकता, चरज, बर्वरता ते सामंती युग दे विश्वास, रीति-रवाज ते टोटके दी भरमार बी इं'ने कत्थें च होंदी ऐ।

भद्रवाही लोक कत्थें च -नाग पालेरू जनम, (नागपाल दा जनम), मेला पट्ट, पीर थान (पीरें दा-शाप), चनोतिरू दत्त (चनोत ग्रां दा दत्त), गम्भीरचन्द, डन्डेरो पुहाल (डंडी ग्रां दा गद्दी), बासकुण्ड ते कपलासेरू सेद (कैलाश दा साधु) कत्थां इं'दे सभनीं च असेंगी इतिहासक ते मिथक तत्त्व लभदे न, जेहूडे उस अंचल दी सांस्कृतिक विरासत दी स्हेई अक्कासी करदे न।

इससै चाल्ली भद्रवाही कहावतें च असेंगी भद्रवाही कहावतें, मुहावरें ते फलौहनियें च बी उस अंचल दी संस्कृति दियां झलकियां लभदियां न। मसाल दे तौर पर किश कहावतां, मुहावरे ते फलौहनियां गौर करने जोग न :-

कहावतां

(1) अपनी गादि कोई मुश्क न शिंगे।

अपना दोश कुसै गी बी नेई लभदा।

(2) अमरेरू थुककोरू तुतरे पेटे।

दूएँ आससै गत्त कड्ढने आहला आपूं उसदे च पौंदा ऐ।

मुहावरे

(1) अपने कों बरो जो धूनू।

अपने भांडे च गै दुद्ध दूहना।

(2) एस्सन धूड़ सडनी।

अक्खीं च धूड़ पानी।

(3) विशशतां उलाट फिसनू।

जबानी ज'मा खर्च करना।

फलौहनियां

(1) नीली तलाई जोता खाई (दीआ)।

(2) धारे पुड़ शाम, न बुज्जो ए, पित्तल न बुज्जो ए ट्लाम (चन्न)।

(3) सित्तूं मकान, न खिडकी तान - रोशनदान (अण्डा)।

धार्मिक-जीवन

भद्रवाह-प्रदेश प्राचीन काल थमां गै देवतें, सिद्धें, यक्षें, किन्नरें, नागें, रिशियें-मुनियें-साधु-सन्तें ते अज्ञात शक्तियें दी बास-भूमी रेही ऐ। आदिदेव भगवान् म्हादेव ते माता पार्वती ते कन्नै उ'दे गणें दी एह भूमी क्रीड़ा-स्थली रेही ऐ। जित्थें नाग-संस्कृति दा प्रश्न ऐ, उसदा ते भद्रवाह प्रमुख केंद्र रेहा ऐ। एह संस्कृति इत्थें केई सदियें तक शाना-ब-शाना फलदी-फुलदी रेही। बासुकि-पुराण इस बारे असेंगी विस्तार कन्नै जानकारी दिंदा ऐ। इत्थें उस अंचल दी धार्मिक आस्था दी विस्तार कन्नै जानकारी इस चाल्ली ऐ :-

देव मन्दर

(1) शिवमन्दर - (गुफा मन्दर)

भद्रवाह नगर दे कोल बगने आहली नीरू नदी दे उत्तर आहले पाससै शिवजी दा गुफा मन्दर भद्रवाह प्रदेश दे लोकें दी धार्मिक आस्था दा प्रमुख केंद्र ऐ, की जे शिव भगवान नीरू तट दे उत्तर आहली प्हाड़ी दी गुफा च विराजमान न, इसलेई भगवान शिवजी गुप्तेवर म्हादेव नांS कन्नै गै इस प्रदेश च प्रसिद्ध न। शिवजी दे सभनीं निक्के-बड्डे मंदरें च इसदा प्रमुख थाहर ऐ, इसलेई गै इस दी प्रसिद्धि बी समूचे भद्रवाह अंचल च गै नेई, बल्के पूरे जम्मू-संभाग च ऐ ते लोक इसदे प्रति अपनी गूढी आस्था रखदे न। धार्मिक आस्था दे इलावा इस गुफा मंदर कन्नै केई दंद-कथां ते मिथक-इतिहासक प्रसंग बी जुड़े दे होने कन्नै इसदा सांस्कृतक महत्त्व बी घट्ट नेई ऐ। गुप्तेवर म्हादेव दी जलैहरी दे पिछले पाससै लगातार जेहड़ी जलधारा चलदी ऐ, ओह गुप्तगंगा नांS कन्नै लोकें दी शरधा-भावना दा केंद्र ऐ। इ'यां पवित्र नदी नीरू दे तट उपपर प्राकृतिक गुफा ते उसदे बिच्चा निकलदी पवित्र जलधारा, जेहड़ी गुफा दे अंदर विराजमान भगवान शिवजी दे हर बेल्लै चरण धोंदी रौहदी ऐ, इक अलौकिक तीर्थ आहला दिशश उपस्थित करदी ऐ। इ'यै नेहा अद्भुत संयोग सारें भारत 'च शायद गै कुतै दिक्खने गी लब्धै।

(2) पांडव बौल्ली

इस गुफा दे बाहर सामनै फर्श दे इक कोने पर थोढ़ी नेही जगह गी खोदियै बनाई दी इक निक्की जनेही बौल्ली बी मजुद ऐ। इसदे कन्नोआ आहली प्हाड़ी दी गुफा दे अंदरा दा निकलियै बाहरे गी बगदी औंदी गुप्त-गंगा दी जलधारा सब थमां पैहलै इस बौल्ली च पौंदी ऐ ते पही इस थमां बगियै नीरू नदी च जाई पौंदी

ऐ। आखदे न जे पाण्डव अपने अज्ञातवास दे दरान, जिसलै किश चिर भद्रवाह च रेह हे, तां उ'नें माता कुंती दे न्हौने ते कम्पडे धोने आस्तै इस बौल्ली गी बनाया हा। इस बौल्ली दे उपपरले पाससै चट्टानै दे उपपर ब्राह्मी लिपि च किश अक्खर लखोदे न, जेहडे इस गल्ला दा सबूत न जे गुप्तेवर म्हादेव दा ओह मंदर ते पांडवे दी बौल्ली बगैरा सब थाहर साढ़े प्राचीन सांस्कृतक इतिहास ते पुरातत्त्व कन्नै सरबंध रखदे न।

वासुकी नाग मंदर

(क) नाग-मंदर (गाठा)

इस नाग मंदर दा निर्माण भद्रवाह दे राजा धीपाल ने 1634 ई० दे लागै-देगै करोआया हा। एह मंदर मुख रूप कन्नै लक्कड़ी दा बने दा ऐ। अनुमान ऐ जे इस दे अंदर स्थापत नाग मूरत बी लक्कड़ी दी गै होनी ऐ, की जे उसलै लक्कड़ी दे कम्मै गी गै चिरस्थायी समझेआ जंदा हा। सन् 1835 ई० च चम्बे दे राजा चढत सिंह ने इस मंदर दा नमें सिरैं उद्धार करोआया हा ते इत्थें इक काले पत्थरै दी नाग मूरती बी स्थापत करोआई ही। इस मूर्ति दे पिछलै पाससै टाकरी लिपी च जेहड़ा अभिलेख लखोए दा ऐ, उस थमां साबत होंदा ऐ जे गाठे आहला एह मंदर उस लाके दे सारे नागमंदरें कोला पराना ऐ। उत्थें लखोदे अभिलेख दा अनुदत रूप इस चाल्ली ऐ- १८३४-३५ गी भाद्रों म्हीने दी अष्टमी आहले रोज राजा चढत सिंह ने एह नाग मूर्ति बनोआई ही।

श्री कृष्ण जनमाश्टमी दे बाद औने आहली मस्सेआ गी इत्थुआं दा गै छड़ी मुबारक कपलपत्र कुण्ड दे कोल अयोजत कीते जाने आहले धार्मिक मेले (नाग-मेले) आस्तै जंदी ऐ।

(ख) भद्रवाह नगर आहला नाग-मंदर

एह बड़ा पराना मंदर ऐ। इसदा निर्माण चम्बे दे राजा चढत सिंह द्वारा नौमीं ते दसमीं सदी दे दरम्यान च करोआया गोआ हा। प्रो० प्रियतम कृष्ण कौल दा अनुमान ऐ, जे जिसलै इस मंदर दा निर्माण कीता गोआ हा, उसलै इसदे अंदर शिव, शक्ति ते विष्णु बगैरा दियां मूर्तियां बी स्थापत कीतियां गोइयां हियां, पर बाद च इ'नेंगी इस मंदर चा स्थानान्तरत करी दिता गोआ होना। इत्थें अष्टकमल आहली जलैहरी च शिव-लिङ्ग, महिषासुर मर्दिनी दुर्गा, लक्ष्मी ते गरुड़ासीन विष्णु

दियां मूर्तियां स्थापत न। बाद च बड्डे मंदर च आदमकद वासुकी नाग, जीमूत वाहन ते इक कोने च लौहके अकारं दी शंख चूड़ नाग दी मूर्ती स्थापत करी दिती ही।

इस मंदर दियें इ'नें गौनी मूर्तियें दे मिथक-इतिहासक दी कहानी दे स्रोत असेंगी पशाची भाशा दे गुणादया नांऽ आहले कवि द्वारा रचित 'बुड्ड कथा' च मिलदे न। इस कृति दा संस्कृत भाशा च अनुवाद 'कथा सरित सागर' शीर्षक कन्नै कीता गेआ हा। अनुवादक हे सोमदेव भट्ट। इ'दे बारे च दूई जानकारी मिलदी ऐ, सतमीं शताब्दी दे शुरू च होने आहले थानेसर (कुरूक्षेत्र) दे राजा हर्षवर्धन दे संस्कृत नाटक नागानंद द्वारा। की जे भद्रवाह अंचल च नाग संस्कृति दा प्रभाव प्राचीनकाल च बड़ा मता हा। इसलेई उर्थें इसी मलाइयै नेकें थाहरें नाग मंदरें दा निर्माण होना सभावक गल्ल ही।

भद्रवाह अंचल ते खास करियै भद्रवाह नगर च जिन्ने बी देवी-देवतें दे मंदर न, उं'दे सभनीं च एह बड्डु नगर आहला मंदर सिरमौर थाहर रखदा ऐ। इसदे अंदर स्थापत जीमूत वाहन ते वासुकी नाग दियां मूर्तियां मूर्ति कलाकृति दे स्हाब कन्नै बड्डियां गै नायाव ते दुर्लभ न। इ'नें मूर्तियें गी ते गाठे आहले नाग मंदर दियें मूर्तियें गी घड़ने आहले कलाकार दा नांऽ बस्तीराम हा, जिसदी कला-कुशलता गी सम्मान देने आस्तै चम्बे दे राजा ने उसी पंडित दा खताब दित्ता हा। काले पत्थर दियां आदम-कदद एह मूर्तियां कलाकार दी बिलखन प्रतिभा दा परिचे दिंदियां न।

इस नाग मंदर दियें मूर्तियें दी अद्भुत शिल्पकला दे बारे च प्रो० प्रियतम कृष्ण कौल दा आखना ऐ, जे भाएं इ'नेंगी घड़ने आहला स्थानी कलाकार बस्तीराम हा, पर इ'दे उप्पर कश्मीर घाटी दी शिल्पकला दा स्पष्ट प्रभाव लभदा ऐ। एह तत्थ बी नजर-अंदाज नेई करना चाहिदा जे कोई बी कुशल कलाकार निरी दूएं दी नकल उप्पर गै निर्भर नेई रौंहदा, ओह अपनी कला च अपने स्थानी प्रभाव ते मौलकता दी बी अपनी कलाकृति च जरूर तर्जमानी करदा ऐ। इ'नें मूर्तियें दे इलावा ओड़ा, बावली, वासक-देहरा, धर्मपुरा बगैरा थाहरें च नाग, चंडी माता, शिव ते विष्णु भगवान बगैरा देवी-देवतें दे मंदरें च मूर्तियां बड्डियां कलापूर्ण न, पर समें दे बुरे प्रभाव कन्नै ते विदेशी आक्रमणकारियें दे विध्वंसक हमलें कन्नै इ'दे चा केइयें गी बड़ा नुक्सान पुज्जे दा ऐ।

(ग) देवीरी कोठी ग्रां च गरुड़ासीन विष्णु मूर्ति

इस बे-मसाल सुंदर मूर्ति दी स्थापना भद्रवाह ते चुराह (चम्बा) परगना दे राजा नागपाल (प्रथम) दी रानी माली (जेहड़ी भलेसे दी ही) ने ११६० ई० च उपरोक्त ग्रां च इक बांऽ बनोआइयै उसदे कनारे पर करोआई ही। एह मूर्ति बी मूर्तिकला दा इक नोक्खा नमूना पेश करदी ऐ। एह मूर्ति बासक देहरा आहली मूर्ति कन्नै मता मेल खंदी ऐ। इस बांई दे काल गै ११६० ई० च राजा नागपाल (प्रथम) ने इक शिला लेख बी लखोआया हा, जिस बिच्च चम्बे दे राजा ललित बर्मन ने बी अपनी प्रशंसा भरोचे अक्खर शामिल करोआए हे।

इ'नें मंदरें दे इलावा सुवारधार उप्पर, जेहड़ी भद्रवाह नगर दे उत्तर-पच्छम पासै ऐ, सुव्वा नाग दा बड़ा मशहूर मंदर ऐ। इ'नें नाग मंदरें कोला पता चलदा ऐ जे भद्रवाह प्रदेश च प्राचीन काल थमां गै नाग-संस्कृति दा प्रभुत्व कैम रेहा ऐ। वासुकी पुराण, जिसदी रचना गाठे आहले नाग-मंदिर दे कुसै विद्वान पुजारी ने मता चिर पैहलें कीती ही, दे बिच्च इस प्रदेश च नाग-संस्कृति दे व्यापक प्रभाव दी विस्तार कन्नै चर्चा कीती गेदी ऐ। इन्ना गै नेई इस बिच्च इस अंचल दे लोकें दे धार्मिक, राजनीतिक, इतिहासक ते सांस्कृतिक जीवन दे बारे च बी विस्तार कन्नै चर्चा मिलदी ऐ। स्व० पं० अनन्तराम शास्त्री होरें इस पुराण दी पाण्डुलिपि भद्रवाह नगर थमां प्राप्त करियै उसदा नेकें द्रिष्टियें कन्नै अध्ययन करियै ते उस कन्नै ते भद्रवाह दी आम संस्कृति कन्नै सरबंधत होर समगरी बी किट्ठी करियै पी. एच. डी. डिग्री आस्तै जेहड़ा शोध प्रबंध तयार कित्ता हा, ओह इक सराहने जोग कम्म ऐ।

लक्ष्मीनारायण मंदर

भद्रवाह नगर दे मशहूर मंदरें च इस मंदरै दा बड़ा महत्त्वपूर्ण थाहर ऐ। इसी बजीर मंदर बी आखदे न। की जे इसदा निर्माण बजीर सोबाराम ने करोआया हा, इसलेई इस्सी बजीर मंदर नांऽ कन्नै बी जानेआ जंदा ऐ।

इ'नें मंदरे दे अलावा भद्रवाह नगर च ते इसदे आस्सै-पास्सै दुर्गा मंदर, शारिका मंदर, चंडी मंदर, भद्रकाली मंदर, परिस्थान दा शिव मंदर ते परनाले दा शिव मंदर बगैरा नेकां मंदरें दे अलावा केई मस्जिदां बी न, जिं'दे सभनीं च जामा मस्जिद मशहूर ऐ।

आशा-पति तीरथ

भद्रवाह नगर थमां 15 किलोमीटर दी दूरी पर दक्खन आहली भेठा आशा फ्हाड़ै उप्पर आशा-पति नांऽ आहला पवित्तर थाहर ऐ, जिसी भद्रवाह दे लोक इक तीरथ आहला लेखा मानता दिंदे न। भेजे दे रौहने आहले माधोलाला पाधा हुंदा आखना ऐ, जे सराधे दी मस्सेआ आहले दिन भद्रवाह दा हर त्रीए बरै इक छड़ी चलदी ऐ, जिस कन्नै ज्हारं लोक शामल होइयै इक जलूस दी शकली च चलियै रातीं आशा-पति फ्हाड़ै दे उप्पर इक बड्डे पानी दे स्रोत कोल पुज्जियै सराध ते पिंड दान करदे न ते उससै दिन वापस आइयै भेजा नगर च रात कटदे न।

कपलास कुंड (कैलाश झील)

भद्रवाह नगर कोला 20 किलोमीटर दी दूरी पर दक्खन पाससै कपलास कुंड, भद्रवाह अंचल च सभनीं थमां मशहूर धार्मिक ते तीरथ स्थानें चा इक ऐ। एह झील समुंदर तल थमां 7500 फुट्टें दी उचाई पर ऐ। इस झील गी बासकुंड आखदे न, की जे इस बिच्च वासुकी नागें दा निवास मन्नेआ जंदा ऐ। इससै आस्तै इस झीला दिया उत्तर आहलिया भेठा वासुकी नागै दी मूर्ति बी बराजमान ऐ। इस झीला दे पच्छम आहले पाससै स्योज-धारा दा मदान गुलमर्ग कन्नै मकाबला करदा ऐ। स्योज थमां 1½ किलोमीटर चढ़ाई चढ़ने दे बाद शंखपद्धर नांऽ आहला सुंदर मदान औंदा ऐ, जिसदी उचाई 800 फुट्टें दे लगभग ऐ। ठीक इसदे पूर्व पाससै 1½ किलोमीटर दी दूरी पर बासकुंड (कपलास-कुंड) नांऽ आहली सुंदर झील ऐ। बड़े गै भव्य नजारें आहली इस झीला दा व्यास 3वर्ग किलोमीटर दे लगभग ऐ। इस उप्पर बर्फा दे निकके-निकके तोदे रूएं दे फाहें आहला लेखा तरदे सेही होंदे न। इस झीला दे कंठै पर श्री कृष्ण जनमाष्ठमी दे बाद औंने आहली मस्सेआ गी मेला लगदा ऐ। सौन-भाद्रो दे म्हीनें च बी इस झीला दे कनारै शिहत दी सर्दी होंदी ऐ। मेले आहले दिन इत्थें पुज्जने आस्तै दो रस्ते न - (1) स्योज आहले पाससैआ (2) राम तुन्द आहले पाससैआ। आम लोक स्योज आहले रस्ते थमां गै उत्थें पुजदे न, जदके छड़ी ते छड़ी कन्नै चलने आहले शरधालु लोक ते चले राम तुन्द आहले रस्ते थमां उत्थें पुजदे न। छड़ियां बी नाल्ठी, (भद्रवाह) गाठा (भद्रवाह) ते बलौरा दा औंदियां न। ओह त्रवै छड़ियां मेले आहले दिन कोला पैहलिया रातीं उत्थें पुज्जी जंदियां न। भद्रवाह ते उसदे आससै-पाससै आहले ग्राएं दे शरधालु लोक ते सरकार पाससैआ मुकरर कीते दे ऐहलकार ते कर्मचारी झीला दे

कनारे लक्कड़ियें, कंबलें ते जड़ी-बूटियें दी चाही दा इन्ना बधिया इन्तजाम करदे न, जे किसै किसम दी शकैत दी गंजैश गै नेई रौहदी। शरधालु अग्गी दे ग्याने चबक्खै बेहियै ते भजन बिसनपते गाई-गाइयै ते चलें, ग्रैहणियें (नागदेवते दे अवेश कन्नै) दे नृत्त दिक्खी-दिक्खी सारी रात बताई दिंदे न। मेले आहले दिन ज्हारें-बड्डे लोक कोला दा ते दूरै-दूरै थमां आइयै मेले दी रौनक बधांदे न। मस्सेआ आहले दिन बडलै-बडलै गै लोक झीला च डुबकियां लाई-लाई न्हाइयै पुन्न दे भागीदार बनदे न। पानी इन्ना ठंडा होंदा, जे उसलै मेला कमेटी दे सेवक जड़ी-बूटी आहली चाही दे गलास शरधालुएं दे हत्थें च नेई पकड़ान, तां उंनेगी अपने प्राण बचाने बी मुश्कल होई जंदे न। इंनें पंक्तियें दे लेखक गी 1984 ई० च लग्गने आहले मेले च जाने दा मौका मिलेआ हा। अज्ज बी झीला दा ओह नोक्खा द्रिशश, स्योजा दे मदान च तम्बुएं च रात कट्टनी ते चतरफा प्रकृति दे सुहावने नजारें गी दिक्खियै अजीबो-गरीब अनुभूतियें गी प्राप्त करना, बगैरा-बगैरा चेतै करियै बड़ा नंद अनुभव होंदा ऐ। सचमुच गै कपलास कुंड जां वासुकी कुंड ते उसदे आससै-पाससै दा नोक्खा द्रिशश सुर्गे आहले द्रिशश कोला घट्ट नेई ऐ। सुर्गे आहले द्रिशश दी अस छड़ी कल्पना गै करने आं, जदके वासुकी कुंड आहला द्रिशश ते प्रतक्ख नंद देने आहला ऐ।

मेले दे दूए दिन लोक गाठे आहले नाग मंदर दे अग्गें ग्याना बालियै रात-भर जगराता ते कुड्ड (ढेकू) नाच करियै देवतें गी ते खास करियै नाग देवतें गी प्रसन्न करदे न। रातीं दे खीरलै पैहर, जिसलै सूरज दियां किरणां फ्हाड़ें दियें चोटियें गी छूहन लगदियां, उसलै ग्याने आहलिया जगह पिच्छें बचे दे डारे उप्पर चले छालीं मारी उंदे बिच्चुआं होई-होई इक बड़ा गै दिल ल्हाने आहला द्रिशश पेश करदे न। केई दुखिये सुआली कण सुट्टी-सुट्टी चले कोला सुआल पुछदे न ते उसदे मताबक अपने-अपने घरें च जाइयै मनौतियां वगैरा कार्यवाहियां करदे न।

मेला - पट्ट

नाग-पंचमी आहले दिन स'जां 'लै 3-4 बजे दे लगभग खक्खल म्हल्लै दे मदानै च मेला-पट्ट लगदा ऐ। एह मेला त्रै दिन तक मतबातर चलदा रौहदा ऐ। त्रै दिन गै स'जां दे त्रै ते पंज बजे दे दरम्यान उत्थें कुड्डु नाच बी अयोजत कीता जंदा ऐ। भद्रवाह अंचल च सिर्फ मेला-पट्ट आहले रोज कुड्डु नाच दा दिनें अयोजत कीता जंदा ऐ, नेई तां बाकी मौकें पर जेहड़े बी कुड्डु नाच कीते जंदे न, ओह सब्बै

रातीं बेल्लै गै कीते जंदे न। रातीं अयोजत कीते जाने आहले कुड्ड नाचें दे मौकें पर अग्गी दे ग्याने बी बाले जंदे न, जिं दे चबकखै कुड्ड नाच कीते जंदे न। जदके मेला-पट्ट दे दरान अयोजत कीते जाने आहले कुड्ड नाचें दे दरम्यान च देवी दा चेला इक्क पित्तलू दी गागरी दे गलमे कन्नै केई रंगे दे अनसीते रेशमी टल्ले लपेटियै, उसी अपने सिरै उप्पर रक्खियै चक्राकार स्थिति च नचदा ऐ। उसदे चबकखै बड्डा गोलकार घेरा बनाइयै जिसलै 50-60 आदमी (जवान गभरू ते अधकड़) कुड्ड नाच पेश करदे न, उसलै इक ऐसा दिल-लुहावना ते नोकखा दिश्रश उपस्थित होई जंदा ऐ, जिसदी कल्पना करनी बी नामुमकन ऐ।

इस मेला-पट्ट दी शुरुआत होने दी बी इक नोकखी कहानी ऐ। आखदे न मुगल बादशाह अकबर दे राजकाल च भद्रवाह दा राजा नागपाल (तृतीय) हा। ओह बड़ा नाग-भक्त हा। सालै च इक बारी जिसलै बादशाह अकबर दा शाही दरबार लगदा हा तां उसदी बादशाही दे अधीन सारें राज्यें दे राजें गी उपस्थित होना निहायत जरूरी होंदा हा ते अपनी-अपनी हाजरी दर्ज करोआनी होंदी ही। एह बी शाही फरमान हा, जे दरबार बिच्च पुज्जियै हर इक राजे गी बादशाह दे अगें सिर झुकाइयै सलाम/अदाब-अर्ज करना पौग। इक बारी दरबार च जिसलै भद्रवाह दा राजा नागपाल बी पैहली बारी दिल्ली पुज्जा, तां उसी बी दरबार च प्रवेश होइयै बादशाह दे अगें सिर झुकाइयै अदाब-अर्ज करने बगैरा दे नियम समझाए गे। दरबार आहले दिन जिसलै नागपाल उत्थें पुज्जा तां उन्नै उस नियम दा पालन कीते बगैर गै अपनी कुर्सी मल्ली ते बेही गेआ। उसदी ओह हरकत दिक्खियै सारे दरबारियें गी बी ते बादशाह गी छड़ा बुरा गै नेई लगगा, बल्के उन्नैंगी उस उप्पर क्रोध बी आया। नतीजे दे तौर उसी उसदी हरकत लेई तगड़ी स'जा देने दी बी सोचन लगी पे, पर इक समझदार मंत्री ने सलाह दित्ती जे राजा नागपाल गी इक बारी समझाइयै इक मौका होर देना चाहिदा ते कन्नै गै उसदे आस्तै दरबार च प्रवेश करने दा रस्ता प्रधान द्वार दे बजाए इक दुआरी होनी चाहिदी, तां जे अंदर औंदे मौकै उसी मजबूर होइयै अपना सिर झुकाना पवै। दूऐ दिन जिसलै ओह दरबार दे समें दुआरी बिच्चें अंदर प्रवेश करन लगा तां उन्नै अपना सिर झुकाइयै प्रवेश करने दे बजाए पैहलै अपने पैर अंदर दाखल कीते। उसदी एह हरकत दिक्खियै अकबर समेत सारे अग्ग-बबूला होई गे ते उसगी स'जाए-मौत देने दी सोचन लगी पे, पर फही इक मंत्री ने एह सलाह दित्ती जे राजा नागपाल गी इक मौका होर देइयै आखेआ जा जे अगले दिन दरबार आइयै बादशाह कोला अपनी

गलती लेई माफी मंगै, नेई तां मरने आस्तै त्यार होई जा। जिसलै त्रीए दिन बी नागपाल बारी आहले रस्तै अपने पैरें गी गै पैहलै अंदर बाड़ियै अंदर दाखल होआ, तां बादशाह समेत सभनीं दियां अक्खीं रोहै कन्नै लाल होई गेइयां ते जिसलै बादशाह समेत सब्भै उसी धमकान लगे तां उस दिया पग्गा बिच्चा इक फिनगर नाग अपनी फिन सुआकियै खड़ोई गेआ। उसी दिक्खियै क्या अकबर ते क्या उत्थें बैठे दे मंत्री ते बाकी दरबारी, सभनें दे डर कन्नै परसीने छुड़कन लगी पे ते ओह राजा नागपाल गी हत्थ जोड़ियै आक्खन लगे जे मेहरबानी करियै नाग गी अपनी पग्गा च छपैली, रक्खो। उंदी बिनती मन्थियै राजा नागपाल ने उ'आं गै कीता, जिस कन्नै नागराज होर राजा नागपाल दी पग्गा च फही छप्पी गे। उस चमत्कारी घटना कोला प्रभावत होइयै बादशाह अकबर ने राजा नागपाल गी नेकें रंगें दे रेशमी कप्पड़े ते सुन्ने दे गैहनें देइयै सम्मानत करियै भद्रवाह गी बिदा कीता। राजा नागपाल दी उस आलौकिक विजय दी यादगिरी च गै एह मेला-पट्ट हर साल भद्रवाह दे लोकें द्वारा आयोजत कीता जंदा ऐ।

सांस्कृतिक ते साहित्यिक गतिविधियां

भद्रवाह अंचल दे लोक जित्थें अपनियें धार्मिक आस्थें दे बारे च बड़े कट्टर ते समर्पत न, उत्थें गै ओह अपनी संस्कृति ते भाशा दे विकास ते उस बिच अपना साहित्य लिखने च बी बड़े जागरुक ते गम्भीर न, जिस बारे च ब्योरा इस चाल्ली ऐ :-

(i) मिथ ते इतिहास

भद्रवाही लोकें दा इतिहास, संस्कृति ते भाशा दा बड़ा समृद्ध इतिहास ऐ। दूए लफ्जें च इ'दा सरबंध वैदिक काल कन्नै मता स्पष्ट ऐ। वैदिक संस्कृति दे कन्नै-कन्नै गै इत्थें त्री शताब्दी च नाग संस्कृति बी जम्मी। बाद च ओह इन्नी फली-फुल्ली जे उन्नै इस अंचल च अपना पूरा राज कैम करियै राजनीतिक खेतर च बी अपना कब्जा करी लेआ। उस थमां पैहलै इस प्रदेश च गन्धर्व, सिद्ध, किन्नर ते विद्याधरें दा बी प्रभाव हा। सिद्धराज जीमूत केतु अगरचे आपू बड़ा शिव-भक्त हा, पर उसदा पुत्र जीमूत वाहन म्हातमा बुद्ध दे मत कोला मता प्रभावत हा। उ'नें दिनें गै गरुड़ उस लाकै च आइयै मनमाने ढंगे कन्नै नागें गी मारियै खाई जंदा हा। खीर इक दिन नागें दे राजा वासुक, नाग ने गरुड़ गी समझाइयै उस कन्नै समझोता कीता, जे अगमें कोला गरुड़ सिर्फ रोजै दा इक नाग गै मारा करग। गरुड़ उसदे

मताबक रोज इक्के नागै गी मारिये खान लगा। उस सिलसिले च इक दिन जिसलै शंखचूड़ नांऽ आहले नागै दी बारी आई तां उसदी मां बड़ी रोन लगी। उसदा रोन सुनियै-जीमूतवाहन सिद्ध गी बड़ी दया आई ते उन्न आखेआ, मां तूं मत रो, तैरै पुत्रै दे थाहर में गरुड़ अगँ पेश होई जन्ना। बासकुंड दे कोल शंख पद्धर दे मदान च जिसलै शंखचूड़ दे लबास बिच जीमूतवाहन गी दिक्खियै भलेखै कन्नै गरुड़ उसी खान लगा, तां उसदी इक बांह ख'ल्ल उसदी पत्नी मलपवतीं दे अगँ पेई, जिसी दिक्खियै ओह करलाई-करलाई रोन लगी। जिसलै गरुड़ गी एह पता चलेआ जे जिसी ओह खाऽ करदा ऐ, ओह ते नाग नेई ऐ, बल्के सिद्ध कुमार ऐ, तां उसी बड़ा पच्छोताऽ होआ ते उ'न्न उसी झट्ट छोड़ी दित्ता, जिसी बाद च दुर्गा भगवती (भद्रकाली) ने अमृत छिड़कियै जींदा करी दित्ता। उसदे बाद गरुड़ ने बी प्रतिज्ञा कीती जे अगँ आस्तै ओह नागें दी हत्या नेई करा करग। उस घटना दे बाद उस लाके च नाग जाती फलन-फुल्लन लगी ही। नाग जाती दा पैहला राजा नागपाल (प्रथम) बड़ा प्रसिद्ध हा। दूआ नाग-राजा ते उस कोला बी मता प्रभावशाली हा, जिन्न बादशाह अकबर दे दरबार च जाइयै अपना प्रभाव दस्सेआ ते अकबर कोला सम्मान प्राप्त करियै भद्रवाह दा नांऽ उच्चा कीता हा।

नाग-राजे दे बाद इत्थै किश चिर चम्बे आहले राजे दा राज रेहा ते उसदे बाद किश चिर सिक्खें दा ते उसदे बाद भद्रवाह डोगरा राजें दे अधीन होई गेआ। जित्थें तक भद्रवाह अंचल च सांस्कृतक परम्परा दा सरबंध ऐ, उसदा बी उज्जल इतिहास ऐ। इत्थुआं दे मंदरें दी वास्तु-कला, उ'दें अंदर स्थापत मूर्तियें दी शिल्प-कला दे अद्भुत नमूनें अपना खास मकाम रखदे न। इंदे इलावा इत्थुआं दी नृत्य ते संगीत-कलां बी अपना टकोहदा थाहर रखदियां न। इस अंचल दा कुड्डु (ढेकू) लोक-नाच ते इन्ना आकर्शक ते मन-लुभावना ऐ, जिसी दर्शक-दिखदे मौकै अपनी सुध-बुध बी भलाई दिंदे न। इसदे इलावा घुरेई लोक-नाच (कनचौथ त्यहारे दे मौकै पर) गोजरी लोक-नाच, डागी लोक-नाच, गद्दी लोक-नाच ते सोहाड़ी लोक-नाच बगैरा नेकां नाच भद्रवाह अंचल दी संस्कृति दे प्रतीक न। इस अंचल च जम्मू संभाग आहले लगभग सारे गै त्यहार बड़ी शरधा-भावना कन्नै मनाए जंदे न।

(ii) इस अंचल दी भद्रवाही भाशा दा सरबंध बी वैदक संस्कृत कन्नै मन्नेआ जंदा ऐ। मशहूर भाशा विज्ञानी डॉ सिद्धेश्वर वर्मा हुंदे मताबक, भद्रवाही

भाशा च वैदक संस्कृत दे केई शब्द हाल्ली बी मजूद न ते कन्नै इस भाशा ने संस्कृत, गुजराती ते सिंहली भाशें आहला लेखा नपुंसक लिङ्ग गी हाल्ली तक अपने अंदर संभाली रखे दा ऐ। केइयें विद्वानें दा आखना ऐ जे इस भाशा दी पैहलै अपनी लिपी बी होंदी ही, पर उसदा प्रचलन बंद होई जाने दे बाद इसदे आस्तै देवनागरी-लिपि दा गै प्रयोग शुरू करी दित्ता गेआ।

इस भाशा दियां उ'आं ते सारियां ध्वनियां देवनागरी लिपि आहलियां गै न, पर एह सत्त ध्वनियां उ'दें इलावा बी न :- “ट्ल, ड्ल, ढ्ल, च, छ, ज, ते झ” एह तत्थ बी ध्यान देने जोग ऐ जे भद्रवाही भाशा ‘ओ’ प्रधान भाशा ऐ।

(iii) भद्रवाह दी नाग-संस्कृति

जिसलै अस इस प्रदेश च साहित्य रचने दे बारे च खोज-पड़ताल करने आं तां असेंगी अति प्राचीन काल च संस्कृत बिच्च रची दी वासुकी-पुराण ‘शीर्शक’ आहली इककै कृति दा पता चलदा ऐ। भाएं इस रचना गी पुराण नांऽ दित्ते दा ऐ, पर इसदे श्लोकें दी कुल संख्या 504 गै ऐ। इसलेई साफ ऐ जे एह साढ़े ठाहरें पुराणें बिच्चा इक बी पुराण दी समानता नेई करी सकदा ऐ, की जे उ'नें सभनीं पुराणें दा आकार हर लिहाज कन्नै इसदे मुकाबले च मता बड्डा ऐ। तां बी एह गल्ल खुशी आहली ऐ, जे अति प्राचीन काल च नाग-संस्कृति गी उजागर करने आस्तै कुसै संस्कृत विद्वान् ने इसदी रचना कीती ही। 1983 ई० च पं० मूलराज शास्त्री होरें इसदा हिंदी अनुवाद छापियै समाज उप्पर बड़ा उपकार कीता हा। इसदे इलावा स्व० पं० अनन्तराम शास्त्री होरें श्री वासुकी-पुराणम् (समीक्षात्मकं सम्पादनम्) शीर्शक कन्नै इक शोध-प्रबन्ध लिखियै राष्ट्रीय संस्कृत संस्थान, दिल्ली, थमां पी. एच. डी. दी उपाधि प्राप्त कीती ही। इसदे कन्नो-कन्नी प्रो० प्रियतम कृष्ण कौल ने बी वासुकि-पुराण नांऽ दी रचना प्रकाशित करियै इसदे अधार पर भद्रवाह अंचल च नाग संस्कृति दे प्रचलन दा मुंढ-सिरा तुप्पने दा सराहने जोग कम्म कीता हा। वासुकि-पुराण दे इलावा भद्रवाह दे संदर्भ च ‘काका भाशा शास्त्र’ दे बारे च बी हवाले मिलदे न, पर कोई ठोस प्रमाण नेई उपलब्ध होने करी इस बारे च किश बी आखना कठन ऐ।

(क) मियां गम्भीर चन्द

वासुकि-पुराण दी रचना दे बाद बी क्या उ'नें दिनें बो कुसै कवि जां लेखक ने संस्कृत भाशा च जां भद्रवाही बोल्ली च कोई रचना कीती ही जां नेई ? इस बारे

च कोई जानकारी नहीं मिलती। हां, सताहरीमी सदी दे खीर च मियां गम्भीर चन्द नां दे कवि ने भद्रवाही भाशा च कविता-रचना करियै अपने आप गी इस भाशा दा पैहला कवि होने दा गौरव प्राप्त कीता हा। कवि दी इक कविता दियां किश पंक्तियां काबले-गौर न :-

चम्मे मित्ती लेई-लेई, घरो तां कोल्हेरे लेई।

एन्तरयों ना मैल निस्से, बेरीएं न्हाने सेई।

(ख) पं० गौरीशंकर

1928 ई० च भद्रवाह दे संस्कृत विद्वान पं० गौरीशंकर होरें भद्रवाही भाशा च श्री मद्भगवद्गीता दा पद्यात्मक अनुवाद करियै बड़ा सराहने जोग कम्म कीता हा। उ'नें कन्नै-कन्नै हिंदी अनुवाद बी देइयै अपनी रचना गी होर मता जनोपयोगी बनाई दिता। उदाहरण लेई इक श्लोक अनुवाद समेत इत्थें उद्धृत कीता जंदा ऐ -

संस्कृत “- नैनं छिन्दन्ति शस्त्राणि नैनं दहति पावकः।

न चैनं क्लेदयन्तयापो न शोषयति मारुतः। श्रीगीता २/२३

भद्रवाही-अनुवाद-

ऐस आत्माएं शस्त्र न कट्टन्। पाणि न सेलन् माँए दोग्ग-ट्लट्टन्।

बातें सेंइ भी एह न शुक्के। बलती अग्गमि एस नां फुक्के ॥२३॥

(ग) मास्टर चूनीलाल

पं० गौरी शंकर दे बाद भद्रवाही भाशा दे कवि मास्टर चूनीलाल दा नां ओंदा ऐ। इ'दा जनम कुण्ठान घराने च वि० संवत् 1954 दे पोह म्हीने दी 2 तरीका गी होआ हा। मृत्यु 1966-67 ई० च होई ही। भद्रवाही भाशा च काव्य सृजन दे खेत्तर च इ'नें गै स्टेई अर्थें च होरनीं कवियें आस्तै बी प्रेरणा दा कम्म कीता हा। भाएं इ'नें कोई कविता संग्रैह नेई छापेआ, पर तां बी इंदियां नेकें विशें उप्पर केई कवितां मिलदियां न। उदाहरण दे तौर पर एह कवितांश विचारने जोग न -

नागा बासका हो!

पत इशी रेखां ठारी ठारी, बासका-नागा बासका हो!

उची ठारी तेरी बास, तेठरो नव अहे कमलास।

नागा बासका हो!

(घ) जान मोहम्मद तिशाना

इस कवि दा जनम 1923 ई० च कोटली गां च (भद्रवाह दे कोल) होआ हा। इस कवि ने भद्रवाही च कविता रचियै अपनी खास पनछान बनाई ही, खास करियै भद्रवाही च गजलां लिखियै इ'नें इस भाशा दा पैहला गजलकार खुआने दा गौरव प्राप्त कीता हा। इ'दी इक कविता दे किश बंद इत्थें प्रस्तुत न :-

कवि अपनी प्रियतमा गी सम्बोधन करदे होई आखदा ऐ-

लौ शुकाते ख्याल तेरो तेरो मीं, एपूं-एपूं ज्योई जंजालघेरो मीं।

एछी लैडिचन जताली एपूं मजामी, मने तां देनी देते पेरों मीं॥

अर्थात् - तेरा चेता मिगी म्हेशां परेशान करदा रौहदा ऐ। पर इसदे च दोश ते मेरा गै ऐ, की जे एह परेशानी में आपूं गै बनाई दी ऐ। जिसलै अक्खीं कन्नै अक्खीं मिलियै प्रेम दियां गल्लां करदियां न, तां मिगी अपने मने दा पैहरा देना पौंदा ऐ। 1983 ई० च भद्रवाह दे गाठा म्हल्ले दे श्री हंसराज शर्मा ने रामचरितमानस दे बाल काण्ड ते अयोध्या कांड दा भद्रवाही कविता च दोहें ते चपाइयें च शब्दानुवाद करियै इस भाशा च इक होर नोक्खा कम्म करियै दस्सेआ ऐ।

इ'नें उपरोक्त कवियें दे इलावा भद्रवाह च पं० ईश्वर चंद, लाल चंद, कवि लेखराज, पं० मुरलीधर दत्त, बालकृष्ण चौहान, रसाजावदानी (उर्दू कवि) ते उमर चंद हितेषी बगैरा नेकां कवि न। इ'यां गै गद्य लेखकें च श्री माधो लाल पाधा प्रो० प्रियतम कृष्ण कौल ते प्रो० शिवकुमार बगैरा दे नां उल्लेखनीय न। माधोलाल पाधा ने-‘भड्ललाई ते भड्ललाई’ ते लौहकी भद्रवाही पुस्तक रचियै इस भाशा गी सगोसार कीते दा ऐ।

अज्ज-कल भद्रवाह नगर च आकाशवाणी दा केंदर बी चला करदा ऐ, जिस कन्नै भद्रवाही भाशा ते भद्रवाही संस्कृति बगैरा गी बड़ा प्रोत्साहन मिला करदा ऐ।

भद्रवाही लोकें दा समाजक जीवन

(क) भद्रवाही अंचल च की जे हिन्दू, मुसलमान ते मती-थोड़ी गिनतरी च सिक्ख ते क्रिश्चन (ईसाई) बी रौहदे न, इसदे इलावा कशमीर घाटी, हिमाचल, जम्मू-संभाग दे डोगरी भाशा खेत्तर दे लोक बी आई बस्से दे न, इसलेई इत्थुआं दी संस्कृति ते समाजक-जीवन उप्पर बाहरी प्रभाव बी खासा दिक्खने गी लभदा

ऐ, इससै लेई इत्थुआं दे रीति-स्वाज, खान-पान ते रैहन-सैहन बी उससै चाल्ली अपनी पनछान बनांदे होई बी स्थानी प्रभाव कोला मते प्रभावत सेही होंदे न।

एह प्रदेश मता ठंडा ऐ ते सर्दियें च बर्फ कन्नै खटोई जंदा ऐ। इसलेई इत्थुआं दे लोकें दा मांसाहारी होना सभावक ऐ, भाएं इसदे अपवाद बी जरूर लभदे न। इससै लेई इस प्रदेश च देवते अगें बलि-प्रथा दा चलन आम ऐ। इन्ना गै नेई शराब-नोशी दा बी प्रचलन सभावक ऐ। पर एह तत्थ भद्रवाह अंचल दे लोकें दे बारे च काबले-तरीफ ऐ जे पढ़ाई-लखाई च एह लोक मते अगें न, तां गै भद्रवाह गी जम्मू सूबे दे केरल दा खताब दित्ता जंदा ऐ। एह भद्रवाह गी गै गौरव प्राप्त ऐ जे जम्मू-कश्मीर दे उच्च न्यायालय दे पैहले मुख् न्यायाधीश बजीर जानकी नाथ भद्रवाह दे गै हे।

(ख) खेती-बाड़ी ते फलें-सब्जियें दी पैदावार

भद्रवाही लोकें गी अपनी जमीन कन्नै मता गै प्यार ऐ। भाएं कोई किन्ना धनवान होऐ ते भाएं केड्डी बड्डी नौकरी दे औहदे पर होऐ, ओह समां कडिड्यै खेत्तरें च जिर्मीदारी करना अपनी शान समझदा ऐ।

इत्थुआं दी पैदावार च धान (मुट्टे चौलें आहले) रौंगी, मोठ, माह, राजमांह, मुंगी, मक्की ते कनक प्रमुख न। फलें च स्यऊ, बग्गूगोशा, खोड़, बेही ते मलूक प्रमुख फल न। फलाहारी नाजें च स्यूल, बजरभंग ते द्रेऊ गनाए जाई सकदे न। सब्जियें च कड़म, पालक, सरेंआं, गुच्छियां, ढींगरी कसरोड़, फफरू, बगैरा सब्भै स्याड़ मती मकदार च पैदा होंदे न।

जड़ी-बूटियां ते पेड़-पौदे

भद्रवाह अंचल गी जे जड़ी-बूटियें ते हरे-भरे पेड़-पौधें दा घर आखचै तां अतिशयोक्ति नेई होग।

(क) इत्थें जेहड़ियां किश खास ते मशहूर जड़ी-बूटियां पैदा होंदियां न, उं'दे नांइ इस चाल्ली न :-

धूप, गुग्गल, कुट्ट, फेगू, छगक, नच्चन, चुकरू, नीलकंठी, भड, कीहर, कोंड़, जीवनी, पतीश ते गू बगैरा।

(ख) पेड़-पौधें च दयार, चीड़, मेरू, पड़तल ते बंज बगैरा प्रमुख पेड़ न, जिं'दे कन्नै इस अंचल दा प्राकृतक सौंदर्य स्वीजरलैंड ते दुनिया दे होर खूबसूरत

देसैं कन्नै मकाबला करदा ऐ। इससै करी इस प्रदेश गी सुरग-भूमी दा खताब दित्ता जंदा ऐ। भद्रवाह दे उत्तर-पच्छिम पाससै चिन्ता ते जाई इन्ने खूबसूरत थाहर न, जे जेकर इ'नें गी पर्यटन दे लिहाज कन्नै उन्नत ते विकसत कीता जा तां ज्हारां पर्यटक इत्थें औना शुरू होई सकदे न, जिस कन्नै इत्थुआं दे लोकें दी गरीबी दूर होई सकदी ऐ।

उप्पर दित्ते दे सर्वेक्षण दे माध्यम कन्नै इस पर्वती अंचल भद्रवाह दे धार्मिक, सांस्कृतिक, राजनीतिक ते समाजिक जीवन दी सिर्फ इक झलक गै प्रस्तुत कीती गई ऐ। इ'यां इस लेख दी सीमां गी ध्यान च रक्खियै कीता गेआ ऐ, नेई तां इस सुरग-भूमी दे बारे च जिन्ना बी लिखेआ जा, उन्ना थोड़ा ऐ।

सन्दर्भ ग्रंथ सूची :-

- (1) डॉ० जितेन्द्र उधमपुरी-डोगरी साहित्य दा इतिहास जे० एण्ड के० स्टेट बोर्ड आफ स्कूल, एजुकेशन, 1988।
- (2) माधोलाल पाधा, भद्रवाही भड्लाहत भड्लाई।
- भड्लाई संस्था भद्रवाह, 1979।
- (3) भद्रवाही बालपोथी - भद्रवाही भड्लाहत भड्लाई।
- (4) पं० मूलराज शास्त्री - वासुकि पुराण-हिन्दी अनुवाद प्रकाशक
- पं० धर्मराज शर्मा, गाठा (भद्रवाह) 1983।
- (5) पं० गौरा शंकर - भद्रवाही च श्रीमद्भगवद्गीता, 1995।
- (6) प्रो० प्रियतम कृष्ण कौल - पर्वतों के उस पार,
- (7) श्रो० पी. के. कौल गुप्तेश्वर म्हादेव (भद्रवाह)
- (8) प्रो० पी. के. कौल वासुकी टेंपल
- (9) पं० हंस राज शर्मा - रामायण, भद्रवाही भाशा (बाल औ अयोध्या-कांड) 1983।
- (10) शाहिन (प्रतिका गवर्नमेंट कालेज भद्रवाह) 1970-71
- (11) हमारा साहित्य (2003), जम्मू-कश्मीर-कला, संस्कृति और भाशा अकैडमी, जम्मू।
